

Faruk Selmanović

Zastupnik u Skupštini Kantona Sarajevo

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

n/r Kolegija Skupštine Kantona Sarajevo

Uputiti: Ministarstvo za boračka pitanja Kantona Sarajevo, Ured za borbu protiv korupcije i upravljanje kvalitetom Kantona Sarajevo i Ministarstvo pravde i uprave Kantona Sarajevo

INICIJATIVA

Na osnovu člana 213. Poslovnika Skupštine Kantona Sarajevo, upućujem inicijativu prema navedenim institucijama radi provođenja nadzora nad zakonitošću postupaka javnih nabavki, kadrovskog upravljanja i usklađenosti internih akata sa važećim propisima u JU Memorijalni centar Sarajevo.

Obrazloženje

Dana 07.08.2025. godine u JU Memorijalni centar Sarajevo usvojen je Pravilnik o javnim nabavkama broj: 13-02-01/4-14-130/25, kojim su, prema dostupnim informacijama, predviđeni postupci koji odstupaju od osnovnih principa i procedura propisanih Zakonom o javnim nabavkama Bosne i Hercegovine.

Konkretno, pravilnikom je predviđeno provođenje istraživanja tržišta nakon podnošenja zahtjeva za pokretanje nabavke, što je suprotno logici planiranja i pripreme postupka, te je cjelokupno istraživanje tržišta za robe, usluge i radove povjereno jednom službeniku za javne nabavke, bez obzira na stručnost u tehnički složenim oblastima, naročito kod radova.

Na taj način se jedna osoba dovodi u situaciju da objektivno ne može osigurati zakonitost i kvalitet pripreme postupaka, čime se u startu povećava rizik od kršenja zakona.

Dodatno, evidentan je nedostatak kadrovskih kapaciteta, zbog čega je službenik preopterećen obimom posla, što direktno utiče na zakonitost i efikasnost postupaka. U praksi se učestalo dešava poništavanje tendera za radove, kao i naknadna pojava dodatnih radova koji se potom rješavaju pregovaračkim postupcima bez adekvatne konkurencije, što ukazuje na nedovoljno kvalitetnu pripremu tehničkih specifikacija.

Također, prema dostupnim informacijama, izvršena su unapređenja pojedinih zaposlenika na rukovodeća mjesta bez provedenih javnih konkursa, posebno na pozicije koje podrazumijevaju upravljanje finansijama i radovima, čime se dovodi u pitanje transparentnost i zakonitost zapošljavanja.

Sve navedeno stvara ozbiljan rizik od kršenja principa zakonitosti, transparentnosti, konkurentnosti i ekonomičnog trošenja javnih sredstava.

Imajući u vidu da je Memorijalni centar ustanova od posebnog društvenog i historijskog značaja za boračku populaciju i građane Kantona Sarajevo, neophodno je osigurati da njegovo poslovanje bude u potpunosti zakonito i transparentno.

Stoga predlažem da, Ministarstvo za boračka pitanja Kantona Sarajevo izvrši upravni i institucionalni nadzor nad radom ustanove i zakonitošću internih akata.

Ured za borbu protiv korupcije i upravljanje kvalitetom Kantona Sarajevo provede procjenu rizika od korupcije i analizu postupaka javnih nabavki, zapošljavanja i upravljanja finansijama;

Ministarstvo pravde i uprave Kantona Sarajevo ispita zakonitost Pravilnika o javnim nabavkama, postupaka zapošljavanja i unapređenja bez konkursa, te usklađenost internih akata sa važećim propisima; te da o svim utvrđenim činjenicama i preduzetim mjerama dostave pisani izvještaj Skupštini Kantona Sarajevo.

S poštovanjem,

Faruk Selmanović
Zastupnik u Skupštini Kantona Sarajevo